

Meeqqat tamarmik tunngavimmigut assigiimmik tapisiaqartinneqarnissaat qulakkeerniarlugu, meeqqanut tapip allanngortiterneqarnissaa pillugu apeqquteqaat aallaavigalugu oqallinnissamik siunnersuut
(Inatsisartunut ilaasortaq Anders Olsen, Siumut)

Akissuteqaat

(Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalakkersuisoq)

Siunnersuutigineqartumut Inatsisartunut ilaasortaq Anders Olsen qujassuteqarfigissavara.

Meeqqat atugarissaarlutillu inuulluarnissaat Naalakkersuisunit pingaartinneqartorujussuuvoq. Peqatigitillugu aalajangersimavugut Naalagaaffiit Peqatigiit Meeqqat pillugit Isumaqatigiissutaat ukuni tulliuttuni sulinissami nalerarisariaqartoq. Nassuerutigisariaqarparpulli meeqqanut inuusuttunullu suliassaqaarfik suli unamminartoqartorujussuummat, ajornartorsiutit amerlapput isumaqatigiissummillu malinninniarneput ullumikkut suli angusimanatigu nassuerutigisariaqarlugu. Matumani aamma pineqarput ilinniartoqarneq, peqqinnissaqaarfik, isumaginnittoqaarfik allallu. Suliassarpassuaqarpugut, sulinissatsinnnulli nangaasoqassanngilaq.

aallaqqaasiutigalugu iluarisimaarnartorujussuummat oqaatigissavarput, Naalakkersuisut suliffeqarnermi illuatungeriit suleqatigalugit isumaqatigiimmata naartunermi erninermilu sulinngiffeqarnissamut aningaasaateqaarfik pilersinniarlugu sulissutigineqassasoq. Erninermi sulinngiffeqarnissamut aningaasaateqarfeqalernikkut isumannaarneqassapput suliffeqarnermi pitsaanerusunik naligiissitsisoqalernera, taamaalilluni arnat meeqqiornermik nalaanniittut tunulluutitaassanngimmata taamatullu ilaqutariit meerartallit naartunerup erninerullu nalaani naammaginarumik pilersuinissaminnut tunngavissinneqassammata. Tamatuma ilaqutariit meerartallit atugaat annertuumik pitsaanerulersissavai.

Tamatuma saniatigut meeqqanut tapiissutinut aamma ineqarnermut tapiissutinut aaqqissuusseqqinnissamik Naalakkersuisut suliaqarput, ilaatigut ilaqutariit meerartallit annikitsumik akunnattumillu isertitaqartartut atugarisaasa pitsaanerulernissaannik siunnerfeqartumik, ilaatigut malittarisassat ullumikkut atuuttut paasiuminaalluinnartut aaqqiiffigineqarnissaanik siunnerfeqartumik, tassani tiimimut 1,50 koruunimik anneruppat kinguneqassaaq, ilaqutariit meerartallit aningaasaqarnikkut ajornerusumik inissisimalissasut, pissutigalugu meeqqanut tapiissutit aamma ineqarnermut tapiissutit peertussaammata. Tamannalu naleqqutinngilluinnarpoq. Massakkullumi meeqqanut tapiissuteqartitsineq iliuseqarfiginiarneqalerpoq.

2014-imiit 2016-imut nakkutilliiartornerni paasinarsivoq meeqqat inuusuttullu atugarliortut sumiginnarneqarnissaminnut atornerlunneqarnissaminnullu illersugaasimannngitsut ilimagisamiit amerlanerujussuusut, ilimagisariaqarporlu nakkutilliiartornerni tullinnguuttuni uppernarsineqarumaartoq meeqqanut inuusuttunullu isumaginninnikkut annertunerujussuarmik suliniuteqartoqartariaqassasoq. Nakkutilliiartortarnerni paasinarsisimavoq ulloq unnuarlu angerlarsimaffinnut inissiisoqartarneranik pisariaqartitsineq massakkut qaffasissutsimut sanilliullugu annertunerujussuusoq, ilimagisariaqarporlu

inissiisarnit amerleriapiluussasut meeqqanut inuusuttunullu susassaqarfimmi isumaginninnikkut periusissaliortarnermi malunnaatilimmik allanngortoqanngippat.

Peqatigitillugu inatsisini atuuttuni pisinnaatitaaffiit meeqqat pillugit isumaqatigiisummut naapertuuttunngornissaat qulakkeerneqanngilaq. Inatsisit massakut atuuttut meeqqat inuusuttullu naammaginantumik pisinnaatitaaffeqartinnissaannut naammangillat. Meeqqanut inuusuttunullu suliniuteqarnissamut inatsisitigut tunngavissat malunnartumik sukateriffiginissaat pisariaqarpoq.

Taamaammallu meeqqat tapersorneqarnissaannut inatsisissaq nutaaq meeqqat inuusuttullu atugarisaannik qulakkeerinninnissamut pingaaruteqartorujussuussaaq.

Naalackersuisut isumaqarput meeqqat ilaqutariillu meerartallit atugarisaat ataatsimut, atitunerusumik tamakkiisuunerusumillu qulakkeerinniffiusariaqartut, taamaalilluta tamakkiisuunerusumik aqqissuutissat qulakkeersinnaassagatsigit. Suliniuteqarnermilu meeqqat, ilaqutariillu meerartallit atugarliortut isertitakinnerpaat akunnattumillu isertitallit immikkut qitiutittariaqarput.

Naalackersuisut naalackersuisooqatigiinnissamik isumaqatigiisummi erseqqissumik anguniagaqarput, tassalu ilaatigut aqqissuusseqqinnerit aqutigalugit inuiaqatigiinni naligiinnerusumik atugaqalernissap qulakkeernissaa. Naligiinnerulerneq kikkut tamaasa aningaasanik amerlaqatigiinnik tunillugit pinaviangilaq, paarlattuanilli aningaasat aningaasarsiakinnerpaanut pingaartitsinerulluni tunniunnerisigit. Naalackersuisut nuannaarutigaaq inuiaqatigiinni ilaqutariippassuaqarmat ingerlalluartunik, aningaasaqarnermikkullu atugarissaartunik. Taamaammallu Naalackersuisut ilaqutariit isertitakinnerpaat akunnattumillu isertitallit qitiutippaat. Tamanna tunngavimmigut ersoqatigiinnermik tunngaveqarnermik takutitsiffiusutut Naalackersuisunit isigineqarpoq.

Siunnersuummilu ilaqutariit meerartallit isertitaqortuut allaat meeqqanut tapiissutinik tunineqarsinnaanissaat qulakkeerniarneqarpoq. Meeqqanut inuusuttunullu suliasaqarfimmi unammisassarpasuit, aningaasaqarnikkullu killilimmik atuisinnaanerput eqqarsaatigalugit Naalackersuisut isumaqarput aningaasat suliniutigineqartullu meeqqanut inuusuttunullu atugarliortunut, inuiaqatigiinnilu sanngiinnerpaanut annermik sammitittariaqartut.

Taamatut oqaaseqarlunga Naalackersuisunit kissaatigaarput tamatta oqallilluarumaartugut.